

25 DE NOVEME DE 2021

Manifèst ena ocasion deth Dia Internacionau dera Eliminacion dera Violéncia contra es Hemnes

Aué, 25 de noveme de 2021, commemoram eth Dia Internacionau dera Eliminacion dera Violéncia contra es Hemnes e volem que totes es accions e toti es actes ath torn d'aguesta data s'estenen a toti es dies der an. Era luta entà ua vida liura de violéncias a d'èster diadèra.

En un mon de mès en mès accelerat e cambiant i a, totun, estructures que se resistissen a cambiar, coma es causes que provòquen totes es sòrtes, manères e encastres des violéncias masculistes. D'aqueres formes de violéncia, n'i a qu'evolucionen, d'aites que sorgissen e d'aites que son arreconeishudes, coma a succedit a compdar dera Lei 17/2020, de 22 de deseme, que modifique e agranis era Lei 5/2008, deth 24 d'abriu, deth dret des hemnes a eradicar era violéncia masculista.

Era modificacion d'aguesta Lei introdusis era reconeishença de naues formes de violéncia, coma:

— Era **violéncia obstétrica e era vulneracion de drets sexuaus e reproductius**, que se definís coma era violéncia que s'exercís damb er objectiu d'empedir o dificultar er accés a ua informacion veraça, de besonh entara prenuda de decisions autonòma e informada. Pòt afectar es diferenti encastres dera salut fisica e mentau, en tot includir-i era salut sexuaue e reproductiva, e pòt empedir o dificultar as hemnes ara ora de préner decisions sus es sues practiques e preferéncias sexuaus, e sus era sua reproduccion e es condicions damb es que s'amie a tèrme.

— Era **violéncia de dusau orde**, que consistís ena violéncia fisica o psicologica, es represalhes, es umiliacions e era persecucion exercida contra es persones que sostien as victimas de violéncia masculista. Includís es actes qu'empedissen era prevencion, era deteccion, era atencion e era recuperacion des hemnes en situacion de violéncia masculista.

— Era **violéncia vicària**, comprenuda coma quinsevolhe sòrta de violéncia exercida contra es hilhes e es hilhs damb era fin de provocar damatge psicologic ara mair, de sòrta que, ath delà dera violéncia dirècta qu'arreceben es hilhes e es hilhs en contèxt dera violéncia masculista, i a er objectiu de hèr mau ara mair, çò que ven un atemptat contra era maternitat e era enfància.

— Era **violéncia digitau**, que consistís en toti es actes de violéncia masclista e misoginia en linha cometudi, instigadi, amplificadi o agravadi, en partida o totaument, damb er usatge de tecnologies dera informacion e dera comunicacion, plataformes de hilats socials, webs o fòrums, corrèu electronic e sistèmes de messatgeria instantanèa e d'auti mejans semblables qu'afècten era dignitat e es drets des hemnes. Aqueri actes causen damatges psicologics e, quitament, fisics; refortilhen estereotips masclistes; damatgen era dignitat e era reputacion; atempten contra era privadança e era libertat d'obrar dera hemna; li causen pèrtes economicques, e empedissen era sua participacion politica e era sua libertat d'expression.

Era violéncia masclista digitau ei, ath madeish temps, ua sòrta de violéncia masclista e un nau encastre. Malerosament, ei urgent trabalhar-i, pr'amor qu'en totes es sues formes gaudís d'ua grana impunitat. Segons diferenti estudis, coma eth que publicquèc era revista *Pikara Magazine* en 2018 o eth d'Amnestia Internacionau de 2017, eth 76% des hemnes an cambiat es sues conductes per pòur a patir cibersecutament e eth 26% decidís ignorar aquera situacion plan probablament pr'amor qu'eth sistèma non ei a dar responses efectives que garantisquen era proteccion e seguretat qu'an de besonh es hemnes que patissen aquera sòrta de violéncia.

Non podem desbrembar, totun, qu'es hilats socials tanben son un estrument de supòrt mutuau e de sororitat, e que pòden vier un canau de denóncia e de visibilizacion de fòrça formes de violéncia masclista. Per açò, cau potenciar es hilats socials damb perspectiva feminista, entà que venguen tanben estruments de conscienciacion e subervivença laguens eth sistèma patriarcau.

Era mencionada modificacion dera Lei tanben arreconeish diuèrsi encastres enes que se produsís era violéncia masclista:

— Era **violéncia en encastre dera vida politica e en encastre public** des hemnes. En aguest cas, era violéncia masclista se produsís enes espacis dera vida publica e politica, coma es institucions politiques e es administracions publicques, es partits politics, es mieis de comunicacion o es hilats socials.

— Era **violéncia en encastre institucionau**, constituïda pes accions e omissions des autoritats, eth personau public e es agents de quinsevolhe organisme o institucion publica qu'agen era fin de retardar, empachar o empedir er accés as politiques publicques e ar exercici des drets qu'arreconeish aguesta madeisha Lei entà assegurar ua vida liura de violéncia masclista, cossent damb es ipotèsis incluides ena legislacion sectoriaua aplicabla. Per tant, disposam d'un aute estrument legau entà trabalhar contra aquera sòrta de violéncia.

Fin finau, volem destacar er impacte e era indignacion que mos produsissen es **violéncies sexuaus**, es quaus mos secodissen intensament. D'ací estant, aué, 25 de noveme, volem reïterar tot eth nòste supòrt e era nòsta empatia as subreviventes e ath sòn entorn. Non podem contunhar de consentir qu'es hemnes visquen damb pòur, damb era libertat coartada pera menaça d'ues agressions sexuaus que ja aurien d'èster desterrades d'ua societat democratica e liura. Es violéncies sexuaus atempten contra eth principi de libertat individuau. En aquest sens, era Lei 17/2020 amasse peth primèr còp ua definicion deth concèpte de consentiment sexuau, que se compren coma era voluntat expressa, enquadrada ena libertat sexuau e ena dignitat personau, que da pas ar exercici de practiques sexuaus e lo sosten. Era prestacion d'aquest consentiment la cau hèr en libertat e a de demorar pendent tota era practica sexuau. Non i a consentiment s'er agressor cree ues condicions o se profite d'un contèxt que, dirèctament o indirèctament, impòsen ua practica sexuau sense compdar damb era voluntat dera hemna.

Maugrat er auanç ena identificacion e visibilizacion de totes es violéncies masclistes, demore un long camin entà hèr préner consciéncia ara societat sus aqueres violéncies, pr'amor que, laguens deth ventalh de reaccions, era negacion e era actitud defensiva contunhe d'èster era reaccion mès abituau des òmes. Aué, totun, volem emfatizar totes es accions, individuaus e comunitàries, que son fonamentaus entà eradicar es violéncies masclistes. Es accions que constituïssen ua hònt de supòrt e resiliéncia entàs subreviventes, es que demòstren compromís, implicacion, coratge e etica, e es qu'acompanhen des dera autodeterminacion e que hèn a sénter as subreviventes que «non son soletes», abans, pendent e dempús de quina agression masclista que sigue.

Cau, donques, articular e coordinar es accions de besonh contra totes aqueres sòrtes de violéncies masclistes ja existentes, ara ja identificades e emparades pera Lei 17/2020, e dotar-mos d'estruments efectius entà combàter totes aqueres violéncies; n'ei un exemple eth nau protocòu d'abordatge des violéncies masclistes en Catalonha, qu'a de vertebrar es circuits d'accion, tant des des comissions d'encastre locau coma des dera Comission Nacionau.

Deuant totes aqueres violéncies masclistes auem un gran rèpte: actuar de manèra estructurai e preventiva e compdar damb tota era poblacion e toti es territòris. Qu'es hemnes gaudisquen de vides liures e dignes, en quinsevolhe espaci e encastre, a d'èster er èish de totes es societats democraticas e des sues institucions.

Ei en mans de totes es persones que formam aquesta societat era dignitat d'extinguir eth patriarcat e era sua ideologia masclista. Non podem desbrembar que cau activar e connectar eth sentiment de responsabilitat enes òmes, entà que de manèra individuau e collectiva soslinhen es conductes e actituds masclistes pròpies e des sòn parièrs,

25N — Dia Internacionau dera Eliminacion dera Violència contra es Hemnes

e se n'aluenhen. Cau desaubedir es mandats dera masculinitat mès tradicionau e dominanta que se realimente fòrça soent enes hilats e es espacis digitaus, e en toti es encastres dera societat. Auem de besonh crear nau referents entà bastir milèrs de masculinitats responsables, liures, egalitàries, diuèrses, inclusives e suenhaies.

Sonque atau, en tot tèisher aliances e complicitats, poderam bastir un teishut comunitari e un hilat de recorsi que siguen hònt de salut e qualitat de vida entà totes es hemnes e toti es collectius oprimidi d'aguesta societat. Auem de besonh estèner era cultura des afèctes e es suenhs, auem de besonh ligams segurs, respectuosi e amorosi, en toti es encastres des nòstes vides. Coma ditz bell hooks, «considerar er amor coma ua accion, mès qu'un sentiment, entà acceptar era responsabilitat d'estimar», estimar des dera libertat, era egalitat e eth respècte.

Entà ua vida liura de violències masclistes!

